

VIEIROS

Edición xeral

Marcha en defensa do mar

Unhas mil persoas percorreron na mañá do domingo 8 de xuño os 5 quilómetros que separan o porto de Malpica da ermida de Santo Hadrián, fronte ás illas Sisargas, nunha marcha ecoloxista baixo o lema “En defensa do mar”. A marcha, convocada polas principais organizacións ambientalistas de ámbito galego, celebrouse con motivo do Día Mundial do Ambiente para demandar, entre outras cousas, unha solución ao Prestige afundido, a ampliación inmediata do Parque Nacional das Illas Atlánticas ás Illas Sisargas e un modelo enerxético e de transporte menos dependente do petróleo.

- 10:14 09/06/2003

A marcha foi convocada pola [Asociación para a Defensa Ecolóxica de Galiza \(ADEGA\)](#), a [Coordenadora para o Estudio dos Mamíferos Mariños \(CEMMA\)](#), a [Federación Ecoloxista Galega \(FEG\)](#), a [Sociedade Galega de Educación Ambiental \(SGEA\)](#) e a [Sociedade Galega de Historia Natural \(SGHN\)](#). Recibiu o apoio da [Plataforma cidadá Nunca Máis](#).

Ao remate da marcha, o poeta de Malpica Paco Souto leu o manifesto da convocatoria, que incluíu as seguintes demandas:

- Unha solución inmediata e definitiva para o barco afundido, custe o que custe.
- A elaboración dun plano de recuperación ambiental de todos os ecosistemas danados polas mareas negras e pola recolla incorrecta do fuel.
- A declaración inmediata como espazos naturais de protección especial de todas as zonas litorais propostas para formaren parte da Rede Natura 2000.
- A ampliación inmediata do Parque Nacional das Illas Atlánticas ás Illas Sisargas e ás Lobeiras.
- Unha regulación do tráfico marítimo que reduza o risco de novas mareas negras no noso e en todos os mares do planeta. En particular, esiximos a declaración das costas galegas como Zona Marítima Especialmente Sensíbel e a adopción dun réxime de responsabilidade civil ilimitada para toda a cadea involucrada no transporte de hidrocarburos e outras sustancias perigosas.
- Unha política enerxética que sitúe a promoción do aforro e da eficiencia enerxética como a primeira das súas prioridades.
- Unha política de transportes que potencie os modos ecolóxicos (colectivo, peonal,...) e limite o uso do

automóbil privado.

-O cesamento de todos os altos cargos dos gobernos central e galego directamente implicados na xestión da crise do Prestige.

Asistiron á marcha os alcaldes de Malpica, José Ramón Varela, e o de Laxe, Antón Carracedo. As Redes Escarlata sumáronse tamén á marcha achegando as súas pancartas. Despois da marcha, houbo un pequeno recital de poesía coa participación de Xosé Lois Cabana, Paco de Tano, Alberte Ferreiro, Manolo Pita, Marta Dacosta e Paco Souto.